



**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA TEŠANJ
OPĆINSKI NAČELNIK**

Broj: 02-49-2-1073/18

Datum: 16.05.2018. godine

**OPĆINSKO VIJEĆE
T E Š A N J**

PREDMET: Informacija o radu javnih preduzeća kojima
je osnivač Općina Tešanj, za 2017. godinu,-

Godišnji izvještaj o poslovanju javnih preduzeća Općine Tešanj, kao obavezu proisteklu iz člana 6. Zakona o javnim preduzećima da Skupština javnog preduzeća podnosi Općinskom vijeću izvještaj o radu i poslovanju, obuhvata:

- Odluku Skupštine dioničara o usvajanju izvještaja o poslovanju;
- Odluku Nadzornog odbora o usvajanju izvještaja o poslovanju;
- Izvještaj o poslovanju preduzeća, pripremljen u skladu sa utvrđenom formom i propisanim elementima koje izvještaj treba da sadrži;
- Izvještaj o radu Nadzornog odbora;
- Izvještaj revizije, i
- Finansijski izvještaj.

U cilju efikasnijeg rada, vijećnicima su putem e-pošte dostavljeni kompletni izvještaji javnih preduzeća, a Informacija o poslovanju javnih preduzeća Općine Tešanj za 2017. godinu predstavlja kratak presjek najznačajnijih aktivnosti preduzeća u protekloj godini, daje pregled osnovnih finansijskih pokazatelja poslovanja na osnovu izvještaja o poslovanju za 2017. godinu, te oslikava ciljeve i rezultate kao i mjere poduzimane radi ostvarenja ciljeva.

Općina Tešanj osnivač je tri javna preduzeća:

1. JP Rad d.d.
2. JP Toplana d.d.
3. Agencija za razvoj TRA d.o.o.

JP „RAD“ d.d.

U skladu sa zaključcima Općinskog vijeća Tešanj, poslovna aktivnost JP “RAD” d.d. Tešanj, u toku 2017. godine trebala je biti usmjerena na:

- realizaciju zaključka Vijeća iz 2014. godine (povećanje kapitala za objekte koji su predati Rad-u na upravljanje);
- okončanje projekta izgradnje probno-eksploatacionog bunara PEB 1;
- ulaganje dodatnih napora kako bi se besplatnom podjelom posuda za otpad, nabavljenih iz sredstava Federalnog ministarstva okoliša i turizma, povećao broj korisnika za minimalno novih 2000 korisnika;
- povećanje količina recikliranog otpada na 1% od ukupno prikupljenih količina, ili cca 75 t.

Smjernice i zaključci Općinskog vijeća u okviru kojih je trebalo da se odvija poslovanje JP “RAD” d.d. Tešanj trebalo je ostvariti realizacijom slijedećih kratkoročnih ciljeva:

- kvalitetnim i kontinuiranim vodosnadbijevanjem, dispozicijom otpadnih voda, održavanjem komunalne higijene urbanih sredina i zbrinjavanjem komunalnog otpada doprinijeti razvoju i održavanju ekološke sredine, te podizanju kvaliteta života stanovništva,
- kontinuirano širenje obuhvata područja i broja korisnika komunalnih usluga, a samim time i obezbjeđenje rasta prihoda,
- instalacija i primjena GIS-a (geografsko-informacionog sistema),
- dogradnja telemetrijskog upravljanja sistemom vodosnadbijevanja,
- kontinuirana dogradnja MIS-a (menadžment informacionog sistema),
- daljnje širenje reciklažnih otoka, izgradnja neophodne infrastrukture za selekciju i presovanje iskoristivog otpada,
- realizacija planiranih kapitalnih projekata.

U oblasti vodosnadbijevanja JP "RAD" je pružalo usluge za 7.626 korisnika ili za 7,05 % odnosno 502 korisnika više nego 2016. godine kada je broj korisnika iznosio 7.124; odnosno 665 ili 9,5 % korisnika više nego 2015 godine, što ukazuje na kontinuirano širenje mreže vodovoda i povećanje broja korisnika. Tokom 2017. godine isporučeno je 1.297.664 m³ vode što je za 11,84 % ili 137.353 m³ više nego prethodne godine.

U Jelah Polju pušten je u funkciju novoizgrađeni probno-eksploatacioni bunar vode za piće. Projektom početno predviđeni kapacitet bunara je 5 l/s. Tokom izvođenja radova na bunaru uočeno je da se može očekivati i znatno veći kapacitet bunara, pa je iz tih razloga izvršeno preprojektovanje i stvorene tehničke pretpostavke za pumpanje do 15 l/s vode. Stavljenjem u funkciju ovog bunara u znatnoj mjeri će se poboljšati vodosnadbijevanje, odnosno uz racionalnu i namjensku potošnju vode za piće, redukcije bi trebale biti značajno smanjene. Potrebno je naglasiti da su u toku protekle godine na snazi bile redukcije vode za piće i pored činjenice da je isporučeno više 137.353 m³ vode ili 11,84 %. Razlozi su brojni počev od meteoroloških i hidroloških uslova, povećanih potrebe poljoprivrede i privrede, broja korisnika, neracionalne potrošnje i dr. Završetkom zgraadnje očekuje se značajno poboljšanje količina vode, značajn smanjenje ili potpuno odsustvo redukcija.

U distribuciji otpadnih voda tokom 2017. godine registrirano je 2.936 korisnika ili povećanje od 1,5 % odnosno 44 nova priključka.

Prikupljanjem i deponovanjem komunalnog otpada u 2017. godini obuhvaćeno je 7.202 korisnika, što je za 850 korisnika više nego u 2016. godini što je povećanje od 13,38 % novih korisnika. Novim korisnicima posude za otpad su dijeljene besplatno iz kontigenta koji je obezbjeđen u saradnji sa Općinom Tešanj, uz obavezu potpisivanja ugovora.

Realizujući smjernice Općinskog vijeća o količinama otpada na području općine Tešanj, dostavljeni su slijedeći podaci:

- ukupna produkcija otpada na području općine Tešanj procjenjuje se na 11.627 t/god;
- organizovano je prikupljeno i deponovano 2017. godine 7.971,86 t ili 5,8 % više nego prethodne godine;
- u toku 2017. godine škole na području općine Tešanj prikupile su 11,96 t PET ambalaže dok je putem eko otoka i na deponiji prikupljeno 3,37 t, što čini ukupnu količinu od 15,35 t.

U odnosu na ukupno prikupljene količine otpada to čini 0,19 %. Da bi se realizirao zaključak Vijeća bilo bi potrebno prikupiti količinu od 79,71 t recikliranog otpada. Na osnovu ovih podataka može se konstatovati da su količine recikliranog otpada manje za 81 % . U cilju realizacije zaključka stvaraju se pretpostavke na način da je: nabavljena horizontalna presa 25 t za presovanje ambalažnog otpada, nadstrešnica za presovanje ambalaže prilagođena novim uslovima, te poslovnim planom predviđeno formiranje ekipe za prikupljanje i obradu ambalažnog otpada.

Na osnovu ovih podataka može se konstatovati da su količine otpada koje se recikliraju male u odnosu na ukupno prikupljene količine otpada, ali da je JP "Rad" poduzeo određene mjere za poboljšanje ciljeva u ovoj oblasti.

Zaključak Općinskog vijeća o povećanju kapitala društva objektima koji su predani na upravljanje preduzeću nije realiziran. Realizacija ovog zaključka u neposrednoj je vezi sa realizacijom Ugovora o

pružanju javnih vodnih usluga koji je između Općine Tešanj i JP "RAD" dd Tešanj potpisan 31.08.2017. godine uz prethodnu saglasnost Općinskog vijeća (u okviru MEG projekta). Članom 14. Ugovora definisano je da će se status cjelokupne javne vodne infrastrukture, te način njenog evidentiranja definisati naknadno. Općina i preduzeće su poduzeli niz zajedničkih aktivnosti u cilju zauzimanja konačnog stava. Dinamika završetka ove aktivnosti ovisi od odabranog modaliteta, najam vodnih dobara ili dokapitalizacija preduzeća. Prikupjana su određena skustva izvan BiH koja bi mogla biti od koristi. Trenutno u BiH ovo pitanje nema adekvatnu zakonsku regulativu, niti ima posebnu pažnju institucija.

U toku 2017. godine gubitak vode u vodovodnom sistemu Tešanj-Jelah-Kraševo iznosio je 25,17 %, 2016. godine 26,71 %, a 2015. godine 27,56%. Obzirom na starost vodovodne mreže održavanje gubitaka u sistemu ispod 30% je na granici pozitivnog odnosa ulaganja i efekata koji se postižu smanjenjem gubitaka. Imajući u vidu nedovoljne raspoložive količine vode Poslovnim planom preduzeća za narednih pet godina, kao i Strategijom razvoja Općine Tešanj, predviđeno je smanjenje gubitaka za 1 % godišnje.

U okviru realizacije aktivnosti kroz MEG projekat (Općina Tešanj aplicirala - projekat finansira Vlada Švicarske, a implementira UNDP) značajne aktivnosti se provode u cilju smanjenja gubitaka u vodovodnoj mreži i nastaviće se provoditi i u narednom periodu.

Svakako je potrebno napomenuti da su naznačeni gubitci od 25,17 % u vodovodnom sistemu znatno manji od gubitaka kod drugih operatera u Bosni i Hercegovini. Do ovih podataka smo došli kroz projekat MEG, za 18 općina.

U okviru sistema ISO 9001:2008 redovno, jednom godišnje provodi se anketiranje zadovoljstva kupaca. Prosječna ocjena zadovoljstva korisnika u 2017. godini je 4,49 a u 2016. godini je bila 4,41. U okviru upitnika korisnici usluga imaju mogućnost da daju primjedbe i sugestije koje se analiziraju i poduzimaju mjere za povećanje zadovoljstva korisnika. Rezultati ankete se objavljuju na web stranici preduzeća.

Na kraju 2017. godine preduzeće je zapošljavalo 88 radnika (od čega 6 na određeno vrijeme). Tokom godine zaposleno je 10 radnika na neodređeno vrijeme. Za sve prijeme provedena je propisana konkursna procedura, tako da je na kraju godine bilo 88 uposlenika ili 3 % više nego u prethodnoj godini.

Uposleni su u toku godine ostvarili prosječnu neto platu u iznosu od 868 KM, topli obrok po radniku isplaćen je u iznosu od 163 KM a regres u iznosu od 684 KM. Istovremeno je maksimalno isplaćena plata u firmi iznosila od 2.276 KM a najmanja 493 KM.

U toku 2017. godine JP "RAD" d.d. Tešanj ostvarilo je ukupne prihode u iznosu od 3.972.925 KM što je za 11,3 % više u odnosu na 2016. godinu.

Struktura poslovnih prihoda je slijedeća:

- prihodi od vode čine 40 % ukupnih prihoda ili 1.761.808 KM i veći su za 4,2% u odnosu na prošlogodišnje;
- prihodi od zbrinjavanja otpada čine 29 % ili 1.146.788 KM i manji su za 0,7 %;
- prihodi od distribucije otpadnih voda čine 9 % ukupnih prihoda ili 340.057 KM i veći su za 0,5 % u odnosu na prethodnu godinu,
- dok ostali prihodi (zimski služba, komunalna higijena, rad laboratorije itd.) čini 22 % ukupno ostvarenih prihoda.

U toku 2017. godine ostvareni su ukupni rashodi u iznosu od 3.534.508 KM i veći su za 1 % u odnosu na prethodnu godinu.

Struktura poslovnih rashoda je slijedeća:

- materijalni troškovi čine 18 % i veći su za 1,7 %;
- amortizacija čini 19 % i manja je za 1,2 %;
- troškovi proizvodnih usluga čine 3 % ukupnih rashoda itd.

U posmatranom izvještajnom periodu ostvarena je neto dobit preduzeća u iznosu od 399.113 KM. Iz ostvarene dobiti obavezno je u rezerve izdvojiti 5 %, odnosno 19.955,67 KM, dok će ostatak neto dobiti u iznosu od 379.157,33 KM biti iskorišten za povećanje osnovnog kapitala društva. Naime

prema Poslovnom planu preduzeća 2018-2022. godina planirano je da se sredstva utroše u kupovinu nove i zanzavljanje postojeće opreme (radne mašine za rad na deponiji, čišćenje ulica...). Povećanjem osnovnog kapitala društva povećana je i nominalna vrijednost Općinskog kapitala u preduzeću.

U toku 2017. godine Nadzorni odbor preduzeća održao je ukupno 17 sjednica, na kojima su razmatrana pitanja iz nadležnosti Nadzornog odbora. O svom radu Nadzorni odbor redovno izvještava Općinskog načelnika i resornu Službu dostavom zapisnika o održanim sjednicama. Nadzorni odbor je mišljenja da je Izvještaj o poslovanju preduzeća za 2017. godinu realan te da je na analitičan način prikazao poslovanje preduzeća. Sjednice su održavane prema ukazanoj potrebi.

Zaključci i smjernice Općinskog vijeća Tešanj za JP „RAD“ u 2017. godini

1. Realizirati zaključak Vijeća iz 2014. godine (povećanje kapitala za objekte koji su predati Rad-u na upravljanje);
2. Smanjenje gubitaka vode u sistemu u narednih pet godina, za 1 % godišnje, uz implementaciju ciljeva iz Strategije za obezbjeđene novih količina;
3. Nastaviti aktivnost na realizaciji zaključka, koji je djelimično realiziran, o povećanju broja korisnika odvoza otpada besplatnom podjelom posuda za otpad nabavljenih iz sredstava Federalnog ministarstva okoliša i turizma, povećanjem broja korisnika za minimalno novih 1200 korisnika;
4. Povećati količinu recikliranog otpada na 1% od ukupno prikupljenih količina, ili cca 75 t.

JP „TOPLANA“ d.d.

U skladu sa zaključcima Općinskog vijeća Tešanj, poslovna aktivnost JP “TOPLANA” d.d. Tešanj, tokom 2017. godine trebala je biti usmjerena na slijedeće:

- završetak posljednje III faze sanacije deponije šljake kao uslov produženja/dobijanja okolinske dozvole za rad “Toplana”;
- kao trajan proces zadržati minimalno stepen naplate od 81% uz ulaganje napora na povećanju procenta naplate potraživanja;
- Uprava i Nadzorni odbor se zadužuju da osnivaču predlože nove mogućnosti i način podsticanja novih priključaka kako bi osnivač donio adekvatne smjernice.

U cilju realizacije zaključaka "Toplana" je u planu rada za 2017. godinu postavila slijedeće ciljeve:

- a) zadržati postojeće kupce toplotne energije,
- b) priključiti JP “RAD” d.d. Tešanj na sistem daljinskog grijanja,
- c) priključiti nove korisnike na postojeće instalacije (gdje ima rezervi),
- d) održati likvidnost,
- e) pravilno i efikasno koristiti i održavati sistem proizvodnje i distribucije,
- f) blagovremeno obezbijediti dovoljne količine energenta,
- g) obezbijediti pozitivan finansijski rezultat u 2017. godini.

U toku 2017. godine ukupna vrijednost prodate toplotne energije iznosi 1.781.304 KM i veća je za 3 % u odnosu na 2016. godinu. U istom periodu razmatrano je ukupno 81 zahtjev (priključci, energetske saglasnosti, načelne saglasnosti, blindiranje, isključenje, umanjenje fakture, prigovori) i veći je za 56 % (52 zahtjeva) u odnosu na 2016. godinu. Osim toga u u posmatranom periodu primljeno je 16 stranaka na razgovor ili davanje informacija. Svi primljeni zahtjevi su riješeni.

Ukupni broj korisnika usluga “Toplana” d.d. pravnih i fizičkih lica u protekloj godini je 705, a ukupna grijana površina iznosi cca 62.085 m² (stambenog 32.521 i poslovnog 29.564) i 96.000 m³ proizvodnog prostora. U odnosu na prethodnu godinu broj korisnika povećan je za 2% odnosno od 694 korisnika u 2016. godini povećan je na 705 u 2017. godini, dok je grijana površina povećana za 2% kod stambenog i poslovnog prostora, a proizvodni je ostao nepromjenjen.

Postavljeni cilj o sanaciji deponije šljake kao jedan od preduslova za produženje okolinske dozvole, realiziran je u cjelosti početkom tekuće godine. Sanacija deponije je realizirana fazno.

Kao trajan proces zadržavanje stepena naplate potraživanja na nivou od 81 % nije realiziran. I pored činjenice da se na ovoj aktivnosti kontinuirano radi, tokom 2017. godine stepen naplate iznosi 73,3 %.

Uprava i Nadzorni odbor imali su obavezu da osnivaču predlože nove mogućnosti i način podsticaja za povećanje broja novih priključaka kako bi osnivač donio adekvatne smjernice. Tokom 2017. godine takva vsta inicijative nije dostavljena osnivaču. U izvještaju o poslovanju za 2017. godinu na osnovu koga je pripremana ova informacija, "Toplana" d.d. je u zaključku svog izvještaja dostavila prijedlog stimulativnih mjera koje bi trebale biti podsticaj za priključak novih korisnika:

- a) da se iznos priključne takse od 10 KM/m² koliko sad iznosi, smanji za 70 % i
- b) svim novim korisnicima (fizičkim licima), koji se žele priključiti na jedinstveni sistem grijanja, daje se mogućnost nabavke paketne podstanice na odgođeno plaćanje od 12 mjeseci.

U cilju realizacije definiranih ciljeva kvaliteta i u cilju provedbe obaveza vezanih za Okolinsku dozvolu i standard ISO 14001, u toku 2017. godine od strane akreditovanih institucija vršen je redovan monitoring kvaliteta zraka, te sastav dimnih plinova na dimnjaku. U cilju smanjenja emisije dimnih plinova i poboljšanja procesa sagorijevanja uglja uvedeni su u upotrebu odgovarajući aditiva-katalizatori koji nažalost nisu dali očekivane rezultate.

U toku 2017. godine radeno je na finalizaciji Studije opravdanosti javno privatnog partnerstva za toplifikaciju Pousorja (općine Tešanj, Usora i Doboj Jug) izvorima obnovljive energije, kao drugi korak u ostvarivanju projekta u okviru javno privatnog partnerstva. Naime, poznato je da je Općina Tešanj finansirala izradu Idejnog projekta toplifikacije općine Tešanj obnovljivim/ekološki prihvatljivim izvorima energije u okviru projekta "Toplifikacija Pousorja (općine Tešanj, Usora i Doboj Jug)". Izrada Studije trebala je biti finansirana od strane Kantona. Nakon Pisma namjere u izradu Studije se uključila REZ Agencije koja je istu prefinansirala sa 20.000 KM. Nacrt Studije je završen.

U toku 2017. godine „Toplana“ je ostvarila ukupne prihode u iznosu od 1.872.404 KM što je u odnosu na prethodnu godinu više za 75.560 KM ili 4,2 %. Ukupni rashodi su ostvareni u iznosu od 1.778.278 KM, što je u odnosu na rashode iz prethodne godine više za 3,8 %. Na osnovu ovih pokazatelja "Toplana" je ostvarila neto dobit u 2017. godini u iznosu od 84.476 KM ili 12 % više nego u prethodnoj godini. Dobit se raspoređuje za pokriće gubitaka iz prethodnog perioda.

U toku 2017. godine "Toplana" je svoju osnovnu funkciju, proizvodnju i distribuciju toplotne energije obavljala sa 22 zaposlena radnika koliko je imala i u prethodnoj godini. Trenutno "Toplana" zapošljava 19 radnika u stalnom radnom odnosu. Tokom 2017. godine nije bilo novog zapošljavanja a dva radnika su napustila firmu (1 penzionisanje, 1 radnik dobrovoljno napustio firmu). U narednoj godini planirano je zapošljavanje 1 izvršioca na poziciju inženjera proizvodnje i distribucije, na neodređeno vrijeme i 3 radnika na određeno vrijeme u proces proizvodnje.

Na dan 31.12.2017. godine "Toplana" ima potraživanja od kupaca u iznosu 755.042 KM. Potraživanja do godinu dana iznose 715.862 KM, u okviru čega potraživanja od fizičkih lica iznose 176.067 KM a potraživanja od pravnih lica 539.795 KM. Potraživanja starija od godinu dana iznose 39.180 KM od čega fizička lica čine 33.885 KM a pravna 5.295 KM. Najznačajnije učešće u potraživanju od kupaca, pravnih lica imaju "Pobjeda" d.d. Tešanj (157.056 KM), Opća bolnica Tešanj (76.986 KM) i Ministarstvo obrazovanja, nauke, kulture i sporta (43.704 KM).

Zadovoljstvo korisnika usluga mjeri se provođenjem Ankete svake sezone grijanja. Upitnik je kreirala certifikacijska kuća u saradnji "Toplana" d.d. Nakon provedene ankete vrši se analiza dobijenih rezultata i poduzimaju mjere koje su propisane standardom 9001:2008 i 14001:2004 koji su implementirani u "Toplana" d.d. Anketa zadovoljstva kupaca za grejnu sezonu 2016/2017 dala je prosječnu ocjenu 4,77.

Nadzorni odbor JP „Toplana“ u 2017. godini održao je 10 redovnih sjednica i na taj način vršio kontinuiran nadzor nad radom i poslovanjem društva i Uprave, uz redovno izvještavanje Općine. Izvještaj o poslovanju za proteklu godinu je usvojen uz konstataciju da je 2017. godina protekla bez značajnijih zastoja u isporuci toplotne energije zahvaljujući prije svega planskom održavanju i rekonstrukciji kapaciteta i zalaganju uposlenih. Kao značajan problem izdvojena je problematična naplata potraživanja. Osim toga naglašena je dotrajalost proizvodnih postrojenja i potreba zamjene postojećih kotlova novim postrojenjima.

Zaključci i smjernice Općinskog vijeća Tešanj za JP „TOPLANA“ u 2018. godini

1. Kao trajan proces dostići minimalno stepen naplate od 81% uz ulaganje dodatnih napora na povećanju procenta naplate potraživanja,
2. U cilju povećanja broja korisnika toplotne energije Uprava preduzeća će pripremiti prijedlog mjera koje trebaju stimulisati povećanje broja priključaka. Prijedlog mjera predložiti osnivaču.
3. Preduzeće će pripremiti plan novih investicija kojima bi se poboljšali rezultati rada preduzeća i broj korisnika, analizirajući različite modele finansiranja (kredit, JPP, javni pozivi...)

Agencija za razvoj „TRA“ d.o.o.

U skladu sa zaključcima i smjernicama Općinskog vijeća Tešanj, poslovna aktivnost Agencije za razvoj Općine Tešanj “TRA” d.o.o. u toku 2017. godine trebala je biti usmjerena na:

- nastavak redovne aktivnosti pripreme i implementacije projekata za potrebe realizacije strateških ciljeva Općine Tešanj, javnih preduzeća i javnih ustanova;
- medijsko predstavljanje i drugim pogodnim aktivnostima upoznati poslovnu zajednicu i građane sa radom OSS ureda i mogućnostima koje pruža (Savjetovalište za privrednike i servis “Sve na jednom mjestu”);
- organizaciju obuke radne snage na osnovu Analize usaglašenosti sistema obrazovanja sa potrebama privrede;
- obezbjeđenje jednog volontera, usvojiti i implementirati strategiju razvoja kadrova.

U cilju realizacije zaključaka "TRA" je u planu rada za 2017. godinu postavila slijedeće ciljeve:

- a) rad OSS ureda usmjeriti na podršku MSP;
- b) organizovati najmanje 1 ciklus obuke za radnu snagu;
- c) podrška uzgoju jagodičastog voća;
- d) razvoj i proširenje kapaciteta plastične proizvodnje na području općine Tešanj;
- e) izrada projektnih prijedloga;

Planirane aktivnosti tokom 2017. godine “TRA” je realizirala na slijedeći način:

U okviru aktivnosti projektnog menadžmenta u 2017. godini pripremljeno je i aplicirano sa ukupno 11 novih projektnih aplikacija, od čega su 3 projekta odobrena i realizirana, 5 odbijeno, a 3 su u fazi ocjenjivanja. Agencija je tokom 2017. godine aktivno radila na realizaciji 5 projekata.

Projekti u fazi realizacije u 2017. godini:

Projekt COBEAR je tokom 2017. godine uspješno okončan. Evaluacija i revizijski izvještaj po ovom projektu da li su pozitivnu ocjenu. Aktivnosti su uglavnom bile usmjerene na pružanje konkretnih usluga za mala i srednja preduzeća u BEAR području i promociju samog projekta kroz medije. Aktivnost je konkretno bila usmjerena na certificiranje sistema, procesa i proizvoda, stvaranje prototipa i brendiranje proizvoda. Pored promotivne aktivnosti u 2017. godini realizirani su B2B susreti sa firmama iz Slovenije. Sve planirane aktivnosti kroz COBEAR projekat su realizirane u znatno većem obimu (planirana izrada 6 marketing i biznis planova - realizirano 12; planirana priprema i uvođenje standarda kvaliteta u 6 firmi, realizirano u 13 itd).

Podizanje nasada maline je projekt vrijedan 280.872,85 KM doniran od strane Katarske organizacije Charity al Qatariya čija realizacija je započela 2016. godine. Cilj projekta je da prati cijeli ciklus podizanja zasada maline - od momenta odabira kandidata, pripreme zemljišta i sadnje do prve berbe. Cijeli ovaj period je predviđena podrška agronoma svim korisnicima projekta. U toku 2017. godine

proizvedeno je ukupno 58 t maline. Na osnovu ostvarenih rezultata i pored problema koji su bili prisutni sa niskom otkupnom cijenom maline, prosječna primanja korisnika sredstva iznosila su 3.039 KM po domaćinstvu.

Projekt povećanja prihoda ugroženih grupa u toku 2017. godine započeo je realizacijom obuke za 10 tema vezanih za proizvodnju rasada, kultivaciju zemljišta u plastenicima, upotreba sredstava za zaštitu, održavanje plastenika, itd. Predavači su bili univerzitetski profesori iz Češke Republike. Obuku je pohađalo 50 odabranih korisnika. Izvršena je nabavka i postavljanje plastenika sa pratećom opremom te je svim korisnicima dostavljen sadni materijal. Sumirajući rezultate projekta može se konstatovati: 50 korisnika u 50 plastenika površine 300 m² proizvelo je ukupno 84,7 t paprike (obezbjeđen otkup), 25 t paradajza, 4,7 t krastavca, 1,05 t jagode.

Projekat – Lean production obuka, podržan je od strane Federalnog ministarstva za razvoj, poduzetništvo i obrt sa iznosom od 20.000 KM. U sklopu projekta realiziran je program obuke 12 učesnika iz Madi d.o.o., Mann Hummel BA, Saračević d.o.o., Medena Commerce d.o.o. i Artisan d.o.o., nakon obuke učesnicima su uručeni certifikati. U sklopu projekta izrađena je specijalizovana publikacija o upravljanju kvalitetom. Organizovana je studijska posjeta R Sloveniji. Na kraju projekta organizovan je okrugli sto na temu: konkurentnost radne snage u području srednjeg i vršnog rukovodstva i potrebe firmi za specijalizovanim znanjima i vještinama.

Projekat Intervencija razvoja tržišta u sektoru poslovnih usluga finansiran je sredstvima Općine Tešanj i Vlade Švicarske. Ukupna vrijednost projekta je 23.000 KM. Kroz projekat se odabranim korisnicima pružila mogućnost finansiranja realizacije poslovne ideje u sektoru poslovnih usluga. Projektom je podržano 5 firmi iz sektora poslovnih usluga na području Općine. U sklopu realizacije projekta zaposleno je 7 osoba sa evidencije Zavoda za zapošljavanje. Projekat je u fazi realizacije.

OSS URED uspostavljen je u sklopu aktivnosti usmjerenih na kreiranje povoljnog poslovnog okruženja, promocija ekonomskih potencijala Općine Tešanj, teritorijalnog marketinga, podrška izvozu i investicijama. OSS ured je bio operativan tokom godine i pružao usluge fizičkim i pravnim licima.

U toku 2017. godine OSS ured je pružio podršku za 13 pravnih lica, dao 3 odgovora na upite MSP, u 9 slučajeva dao informacije o mogućnostima za ulaganje na području općine Tešanj potencijalnim investitorima, u 4 slučaj vodila se aktivnost na uspostavi saradnje. Osim toga u izvještajnom periodu primljene su 63 stranke - građani, 30 pravnih lica MSP i investitora te u 21 slučaju ostvario kontakt sa predstavnicima domaćih i međunarodnih organizacija. Sve pobrojane aktivnosti bilježe povećanje u odnosu na prošlu godinu.

Pored rada OSS ureda kao servisa privrednika "Sve na jednom mjestu" TRA d.o.o. je tokom 2017. godine bila angažirana u nizu projekata i aktivnosti:

- Obuka za potrebe firmi iz oblasti metaloprerade i drvoprerade (u saradnji sa GIZ Prolocal programom organizovan je program obuke pod nazivom "Međunarodni marketing i upravljanje izvozom za metaloprerađivačke i drvoprerađivačke firme sa područja općina Tešanj, Teslić, Gračanica, Brčko, Zenica i Žepče;
- Nova tehnička rješenja ; Predstavnici Agencije u pojedini segmentima uključeni kod realizacije MEG projekta koji vodi Općina Tešanj; Predstavljanje TRA i uspostavljenje saradnje; Uključivanje BH dijaspore;
- Prodaja na tržištu EU (nastavljene su redovne aktivnosti podrške za predstavnike poslovnog sektora kroz pružanje podrške specijaliziranih programa edukacije u skladu sa potrebama domaćih firmi. Tako je za potrebe 30 predstavnika privrednog sektora općina Tešanj, Usora i Srebrenik u Tešnju organizirana edukacija na temu: "Prodaja na EU tržištu-Organizacijsko kupovno poslovanje i vještine prodaje";
- Koordinacija razvojnih agencija i saradnja sa kantonalnim ministarstvima (u organizaciji REZ-a održan je sastanak direktora razvojnih agencija iz regije Centralna BiH. Između ostalih tema dogovorena je koordinacija razvojnih agencija na zajedničkim projektima i inicijativama u narednom periodu. Direktori razvojnih agencija ZDK održali sastanak sa Ministarima u

Vladi ZDK (privreda i obrazovanje) radi definisanja dalje saradnje. Direktor TRA d.o.o. dao je sugestije o kreiranju Programa poticaja za malu privredu u 2018. godini te predložio preporuke za unapređenje procesa obrazovanja odraslih i definisanje statusa agencija u ZDK kao generatorima ekonomskog razvoja;

Kroz Anketu o zadovoljstvu korisnika sumirane su usluge koje je Agencija pružala prema privrednim subjektima i građanima. Ispitivanje zadovoljstva korisnika pruženim uslugama vrši se putem on line anketnih upitnika koji su postavljeni na web i fb stranici Agencije. Anketa je pokazala da su korisnici usluga uglavnom zadovoljni pruženim uslugama (69 %), dok je 60 % ispitanika reklo da je rad Agencije dovoljno transparentan, 45 % ispitanika je odgovorilo da je zadovoljno sa odabranim projektima iz oblasti ruralnog razvoja.

Agencija je u 2017. godini provela obimnu anketu i istraživanje o potrebama tešanjskih firmi.

U toku 2017. godine Agencija nije vršila prijem novih uposlenika. Agencija zapošljava 4 radnika, koji su osim direktora Agencije koji je na mandatu, uposlenici sa ugovorom na određeno vrijeme.

Prosječna neto plata zaposlenih iznosila je 1.187,77 KM (svi zaposleni imaju VSS), posljednja minimalna plata isplaćena je u iznosu od 884,17 KM a maksimalna u iznosu od 1.803,89 KM. Regres je isplaćen u iznosu 420 KM po radniku. Sva primanja su na nivou prošlogodišnjih.

U toku 2017. godine Agencija je ostvarila ukupne prihode u iznosu od 401.756 KM i isti su manji za 40 % u odnosu na prethodnu godinu. Razlog ovog smanjenja je u činjenici da je nabavka platenika kroz projekat "Povećanje prihoda ugroženih grupa kroz porodičnu poljoprivredu" čija je vrijednost 567.970 KM, knjižena kao stalna sredstva, a ne kao prihod, tako da je vrijednost stalnih sredstava u bilansu stanja uvećana za ovaj iznos.

Dotacija Općine Tešanj u 2017. godini iznosila je 97.170 KM ili 12 % više nego prethodne godine a čine je grant za bruto plate i naknade – 38.800 KM, materijalni troškovi – 25.000 KM i u ovom iznosu uključen je i iznos za vlastito učešće u realizaciji projekata u iznosu od 33.370 KM.

Učešće Općine Tešanj u ukupnom finansiranju rada Agencije čini 66 % za troškove rada Agencije i učešće u projektima 34 %.



U 2017. godini rashodi su pratili prihode pa su tako ostvareni u iznosu 400.054 KM i isti su manji za 40 % u odnosu na prethodnu godinu. U posmatranom periodu ostvarena je neto dobit u iznosu 310 KM.

Nadzorni odbor Agencije održao je 9 sjednica, uz redovno izvještavanje Općine. Na kraju izvještajnog perioda Nadzorni odbor konstatuje da su na održanim sjednicama redovno upućivali sugestije i prijedloge za dalji rad Agencije s ciljem postizanja veće efikasnosti i boljih rezultata.

Zaključci i smjernice Općinskog vijeća Tešanj za „TRA“ u 2017. godini

1. U toku 2018. godine aktivnost Agencije bit će usmjerena na iznalaženje povoljnih izvora finansiranja (donatorskih ili kreditnih), a za potrebe realizacije projekta Izgradnje prečistača otpadnih voda.
2. Agencija će nastaviti redovne aktivnosti pripreme i implementacije projekata za potrebe realizacije strateških ciljeva Općine Tešanj, javnih preduzeća i javnih ustanova,
3. U narednom periodu osnivač očekuje viši stepen finansiranja Agencije iz vlastitog rada.

OBRADIVAČ
Služba za finansije, privredu, komunalne i
inspeksijske poslove
Hamzaliya Hojkurić, dipl.ecc



OPĆINSKI NAČELNIK

Mr.sci.Suad Huskić